

आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 सोमवार

दिनांक 20.05.2024

प्रमुख समाचार –

- कबीरधाम जिला म आज होय रद्दा दुर्घटना म उन्नीस ज्ञन के मउत होंगे अउ छै जिन घायल—ए घटना म प्रधानमंत्री, छत्तीसगढ़ के मुख्यमंत्री ह जतइन दुख।
- छत्तीसगढ़ उच्च न्यायालय ह सब इंस्पेक्टर भर्ती परीक्षा म फैसला सुनात प्लाटून कमांडर के तीन सौ सत्तर महिला उम्मीदवार मन ल हटाके पुरुष उम्मीदवार मन ल लेके दीन आदेस।
- छत्तीसगढ़ म जनावत गर्मी, लू के बीच मौसम विभाग ह राज्य के एक—दू जघा म गरज—चमक संग बरसा होय के संभावना जताय हे।

दुर्घटना/मौत

कबीरधाम जिला म आज होय एक रद्दा दुर्घटना म उन्नीस ज्ञन के मउत होंगे। मउत होय लोगन म अट्टारह जिन माईलोगिन हे, अउ एक पुरुष सामिल हे। उहें, छह जिन आने मनखे घायल होंगे हे, जउन मन ल इलाज बर अस्पताल म भर्ती कराय गेहे। ए सबो ज्ञन सेमरहा गांव के रहवइया बताय जात हे। पुलिस अधीक्षक अभिषेक पल्लव ह बतइन कि ए घटना जिला के कुकदुर थाना क्षेत्र म ओ बखत होइस, जब एक गाड़ी बाहपानी गांव तीर अंततंते होके खाई म गिर गे। ए गाड़ी म पच्चीस जिन बइठे रिहीन, जेमा पंद्रह ज्ञन के मउकच म मउत होंगे। ए सबो ज्ञन जंगल ले तेंदूपत्ता तोड़ के अपन गांव लहूटत रिहीन। प्रधानमंत्री नरेंद्र मोदी छत्तीसगढ़ के मुख्यमंत्री विष्णुदेव साय अउ उप मुख्यमंत्री अरुण साव अउ विजय शर्मा, सासंद संतोष पांडेय, विजय बघेल अउ कांग्रेस अध्यक्ष दीपक बैज ह ए घटना म दुख जतइन हे। संगेसंग घायल मनके जल्दी स्वस्थ होय के कामना करीन। उहें, कबीरधाम जिला म पाछू रतिहा होय रद्दा दुर्घटना म एक आरक्षक के मउत होंगे। खबर के मुताबिक फटफटी सवार पुलिस आरक्षक खड़े ट्रेलर ले, ले टकरा गीस। घटना के सूचना म पुलिस के टीम घटना के जघा म पहुंचिन। इही बेरा पाछू ले आवत टरक ह पुलिस गाड़ी ल टक्कर मार दीस। जेमा दू जिन पुलिसकर्मी गंभीर रूप ले घायल होंगे, जउन मन इलाज बर अस्पताल म भर्ती कराय गेहे।

उच्च न्यायालय सब इंस्पेक्टर परीक्षा

छत्तीसगढ़ उच्च न्यायालय ह सब इंस्पेक्टर भर्ती परीक्षा म फैसला सुनात प्लाटून कमांडर के तीन सौ सत्तर महिला उम्मीदवार मन ल हटाके तीन सौ सत्तर पुरुष उम्मीदवार मन ल लेके आदेस दीन हे। अदालत ह पैतालिस दिन के भीतरी काम पूरा करे अउ नब्बे दिन म नतीजा घोसित करे के आदेस दिन हे। ए आदेस न्यायाधीश नरेंद्र कुमार व्यास ह सुनाइन। खबर के मुताबिक चयन समिति कोति ले नियम के विरुद्ध प्लाटून कमांडर पद म महिला मन के चयन करे म ए भर्ती विवाद म आगे रिहीस। बछर दू हजार अट्टारा म राज्य म छै सौ पचपन सब इंस्पेक्टर, प्लाटून कमांडर, उप निरीक्षक, प्रश्नाधीन दस्तावेज, उप निरीक्षक अंगूल चिन्ह, उप निरीक्षक के कम्प्यूटर के पद बर भर्ती खातिर विज्ञापन जारी करे गे रिहीस।

जवान घायल

छत्तीसगढ़ ओडिसा सीमा म आज माओवादी मन संग होय मुठभेड़ म ओडिसा के स्पेसल ऑपरेशन ग्रुप के एक जवान घायल होंगे हे। खबर के मुताबिक ओडिसा के सुरक्षाबल तलासी अभियान म निकले रिहीस, तभे कामरभाउदी गांव तीर माओवादी मन गोलीबारी करीन। जेमा एक जवान घायल होंगे, जवान ल पहिली छत्तीसगढ़ के गरियाबंद लाय गीस अउ उहां प्राथमिक उपचार दे के बाद बने इलाज खातिर रईपुर लाय गेहे।

माओवादी फरार

दंतेवाड़ा जिला म काली पुलिस हिरासत ले एक माओवादी फरार होंगे। एला पुलिस ह चार दिन पहिली गिरफ्तार करे रिहीस। फरार माओवादी के नाव देवाराम बताय जात हे। ए रेवाली के रहवइया हरय अउ माओवादी संगठन म जनमिलिसिया के सदस्य रिहीस। गिरफ्तारी के बाद दंतेवाड़ा पुलिस न्यायालय म पेस करे के बाद जेल ले जात रिहीस, जेल ले जाय के दौरान रद्दा म माओवादी के तबियत बिगड़गे अउ ओला जिला अस्पताल म उपचार बर भर्ती कराय गीस। उही बेरा अस्पताल ले माओवादी फरार होंगे। ए मामला म दू जवान ल निलंबित कर दे गेहे। घटना के पुष्टि जिला के पुलिस अधीक्षक गौरव राय ह करीन हे।

ट्रेन हादसा—यात्री

राजधानी रईपुर के उरकुरा स्टेशन म काली शालीमार—लोकमान्य तिलक एक्सप्रेस ट्रेन म बिजली के खंभा गिरे ले घायल तीन झिन यात्री मन इलाज के बाद आज एक इन ल छुट्टी दे दे गीस। उन्हें, दू झिन के इलाज एक प्राइवेट अस्पताल म होवत हे, जिहां उंखर हालत पहिली ले बने बताय जात हे।

वित्त विभाग—कर कटौती

वित्त विभाग ह सरकारी विभाग कोति ले मिलइया जिनि स बिसाय अउ ठेकेदार मन ल होवइया भुगतान म कर के कटौती के नियम ल कड़ाई ले पालन करे के निरदेस दीन हे। ए संबंध म वित्त विभाग ह सबो कलेक्टर अउ विभागाध्यक्ष मन ल दिसा निरदेस जारी करे गेहे। खबर के मुताबिक कतकोन विभाग कार्यालय कोति ले प्रावधान के तहत जीएसटी पंजीयन नइ ले गेहे अउ पंजीयन लेवइया प्राधिकारी मन कोति ले सही किसम ले जीएसटी के स्रोत म कटौती संबंधी नियम के पालन नइ करे जात हे। एखर ले राज्य शासन ल जीएसटी ले मिलइया राजस्व के नकसान होवत हे।

संस्कृत विद्यामंडलम—प्रावीण्य सूची

छत्तीसगढ़ संस्कृत विद्यामंडलम रईपुर कोति ले नवा प्रावीण्य सूची अलग ले जारी करे जाही। छत्तीसगढ़ संस्कृत विद्यामंडलम के सचिव ले मिले जानकारी के मुताबिक कक्षा नौवीं ले बाहरवीं तक के परीक्षा के नतीजा पाछू पंद्रह मई के घोसित करे गे रिहीस। संगेसंग अस्थाई प्रावीण्य सूची घलो जारी करे गे रिहीस। फेर लिपकीय गलती होय सेति ए सूची ल निरस्त कर दे गेहे अउ नवा प्रावीण्य सूची बाद म जारी करे जाही।

सुरक्षा बल—शिविर

मोहला—मानपुर जिला के नवागांव म काली भारत तिब्बत सीमा पुलिस बल आईटीबीपी कोति ले मुफ्त म चिकित्सा शिविर लगाय गीस। ए शिविर म आईटीबीपी के कमांडेंट विवेक कुमार पांडेय ह केंद्र सरकार के विकास संबंधी नीति के संबंध म जानकारी के संग स्वच्छता कोति लोगन ल जागरूक करीन। उन्हें, वाहिनी के चिकित्सा अधिकारी मन कोति ले शिविर म पहुंचे गांव के लोगन के जांच अउ उंखर प्राथमिक उपचार करे गीस।

तालाब गहरीकरण अभियान

बिलासपुर जिला म जनभागीदारी ले तरिया के गहरीकरण अभियान आज ले सुरु होंगे। ऐतिहासिक नगरी रतनपुर के रानी तरिया ले अभियान के सुरुआत करे गीस। पहिली पारी म चालिस तरिया के गहरीकरण करे जाही। जिला पंचायत के मुख्य कार्यपालन अधिकारी अउ एसडीएम कोटा समेत अधिकारी अउ करमचारी मन ह रानी तरिया अउ कोटा ब्लाक के गांव चंगोरी पहुंच के तरिया गहरीकरण के काम म श्रमदान करीन। जिला कलेक्टर अवनीश सरण ह लोगन ले ए अभियान म जुड़े के अपील करीन हे।

मौसम

छत्तीसगढ़ म जनावत गर्मी, लू के बीच मौसम विभाग ह राज्य के एक—दू जघा म गरज—चमक संग बरसा होय के संभावना जताय हे। उत्तर पश्चिम, उत्तर प्रदेश के उपर बने द्रोणिका के सेति प्रदेश म कुछेक जघा म छुटपुट ले मध्यम बरसा हो सकत हे। उन्हें, राजधानी रईपुर म बादर छाय रइही। इही बीच गौरेला—पेण्ड्रा—मरवाही जिला के भाड़ी अउ पनगोटा गांव म गाज गिरे ले गांव के चार झिन मनखे झूलस गे। उन्हें, एक इन के मउत होंगे। घायल मन के इलाज गौरेला के जिला अस्पताल म चलत हे।

यूपीएससी-मॉक टेस्ट

रईपुर जिला प्रशासन कोति ले छब्बीस मई के यूपीएससी प्रारंभिक परीक्षा बर मुफत म मॉक टेस्ट राखे जाही। एखर बर चौबीस मई तक रजिस्ट्रेशन कराय बर पड़ही। परीक्षा के अनुभव खातिर ऑनलाइन के जघा ऑफलाइन मॉक टेस्ट राखे जात हे। ए टेस्ट के प्रश्नपत्र हिन्दी अउ अंग्रेजी दूनो भाषा म होही। जिला प्रशासन कोति ले मॉक टेस्ट के बाद प्रश्न के उत्तर घलो बताय जाही। संगेसंग पहिली तीन स्थान पवइया प्रतिभागी मन ल इनाम दे जाही। ए टेस्ट म छत्तीसगढ़ के कोनो भी जिला के युवा सामिल हो सकत हे। युवा मन के संख्या के आधार म टेस्ट बर जघा अउ बेरा तय करे जाही। एखर सूचना प्रतिभागी मन ल उंखर मोबाइल, नालंदा लाइब्रेरी, सेंट्रल लाइब्रेरी अउ तक्षसिला लाइब्रेरी के सूचना पटल म दे जाही।

संक्षिप्त समाचार

— रायगढ़ जिला के घरघोड़ा थाना क्षेत्र म आज बिहनिया कोयला ले भरे मालगाड़ी पटरी ले उतरगे ए माल गाड़ी कोयला भरके घरघोड़ा ले राजस्थान बर जात रिहीस हे। ए घटना म कोनो कीसम के जनहानि नइ होय हे।

— सक्ति जिला के नंदेलीभाठा आज ले इक्कीस दिवसीय जिला स्तरीय ग्रीष्मकालीन खेल प्रसिक्षण सिविर सुरु होइस। जिला के एसडीएम के.एस.पैकरा ह ए सिविर के सुभारंभ करीन।

— प्रदेश भर के एकलव्य आदर्स आवासीय विद्यालय म कक्षा छटवीं बर भर्ती परीक्षा काली होइस। ए परीक्षा म उनतीस हजार दू सौ विद्यार्थी संघरीन।

— खैरागढ़ पुलिस ह नकली कोल्डड्रिंक बनइया फर्जी फैंक्ट्री म छापा मार के एक मनखे ल गिरफ्तार करे हे। इहां कतकोन कीसम के नकली कोल्डड्रिंक बनाय के काम चलत रिहीस। पुलिस ह मउका ले बड़ मात्रा म खाली बोतल, नकली जूस अउ रेपर बरामद करे हे।
